

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. प्रधानमंत्री नरेन्द्र मोदी होर 11 मार्च थमां 2 दिन लेई मॉरीशस दे दौरे पर जा'रदे न।
2. सरकारै आखेआ जे जम्मू कश्मीर पर इक लक्ख 25 ज्हार करोड़ रपे दियां देनदारियां न।
3. केन्द्र शासत प्रदेश च आयोजित 2025 ब'रे दी पैहली राष्ट्रीय लोक अदालतै दरान इक लक्ख 88 ज्हार मामले दा नबेड़ा कीता गेआ।
4. खेलो इंडिया विंटर गेम्स दे दुए गेड़ दी शुरूआत अज्ज गुलमर्ग च होग।
5. आईसीसी चैंपियन्स ट्रॉफी 2025 दे खिताबी मकाबले च अज्ज भारत दा मकाबला न्यूजीलैंड कन्नै दुबई च होग।

<><><><><><>

PM Mauritius Visit

प्रधानमंत्री नरेन्द्र मोदी होर 11 मार्च कोला मॉरीशस दे दऊं दिनें दे सरकारी दौरे पर रवाना होंगन। मीडिया कन्नै गल्ल करदे होई विदेश सचिव विक्रम मिसरी होरें आखेआ जे मॉरीशस दे कन्नै भारत दे सरबंध सांझे इतिहास, संस्कृति ते केई सदिएं पराने ते दवै मुख्यें दे लोकें दे आपसी सरबंधें ते तालमेल च निहित न। मिसरी होरें आखेआ जे मॉरीशस हिंद महासागर च भारत दे प्रमुख भागीदारें चा इक ऐ ते नेड़मा समुंद्री गोआंढी ऐ। उनें आखेआ जे 2015 च प्रधानमंत्री होरें मॉरीशस सब्बने आस्तै विसन सागर सुरक्षा ते विकास गी स्पष्ट कीता हा जेहड़ा हिंद महासागर खेत्तर दे प्रति भारत दी प्रतिबद्धता गी रेखांकित करदा ऐ। विदेश सचिव होरें अगगे आखेआ जे भारत दी मॉरीशस कन्नै निगगर विकास आली सांझेदारी ऐ। उनें आखेआ जे दवै मुख्यें बशकार पिछले 10एं ब'रें च सरबंध बड़े मते डूहंगे होए न। उनें आखेआ जे प्रधानमंत्री मोदी होर 12 मार्च गी मॉरीशस दे राष्ट्री ध्याड़े पर लगने आले कार्यक्रम च मुख्य परौहने दे तौरा पर शामिल होंगन। प्रधानमंत्री अपने दौरे दरान मॉरीशस दे राष्ट्रपति ते प्रधानमंत्री हुंदे कन्नै मलाटी बी करगन।

<><><><><><>

JK Debt

जम्मू कश्मीर सरकार आखना ऐ जे पिछले माली ब'रे दियां ओहदियां देनदारियां कुल 1 लख 25 ज्हार करोड़ रपे दियां न। विधानसभा च सज्जाद गनी लोन हुंदे सुआल पर इक लिखित परते च मुख्यमंत्री जिंदे कश खजाना मैहकमे दी जिम्मेदारी बी ऐ, होरें दस्सेआ जे 3 मार्च 2024 तगर जम्मू कश्मीर दियां कुल देनदारियां 1 लख 25 ज्हार 205 करोड़ रपे न जिंदे च भारतीय रिजर्व बैंक कोला लैते दा दोहार, प्रदेश विकास ते होर जरियै बी शामिल न। 2024-25 ब'रे दे आर्थिक सर्वेक्षण दी रिपोर्ट मूजब एह देनदारियां प्रदेश दे सकल घरेलू उत्पाद 2 लख 38 ज्हार 673 करोड़ रपे दा 52 प्रतिशत न। सार्वजनिक दोहार जेहड़ा जे 83 ज्हार 10 करोड़ रपे ऐ ओ 2024 आले माली ब'रे दे 82 ज्हार 300 करोड़ रपे दे अंदरूनी दोहार ते भारत सरकार कोला लैती दी 710 करोड़ रपे पेशगी रकम दा 66 प्रतिशत ऐ। उनें दस्सेआ जे एहदे इलावा बजट च 21 प्रतिशत देनदारियां प्रोविडेंट फंड दियां बी ऐन।

<><><><><><>

Lok Adalat

जम्मू कश्मीर च कल 2025 दी पंचैती राष्ट्रीय लोक अदालत दा सरिस्ता कीता गेआ। एहदा मकसद तौले किफायत ते विवादें दा आपसी सैहमति जां दौनें पक्खें बश्कार सलाह सफाई राएं हल कड्डना ऐ। एह अदालत जम्मू ते कश्मीर ते लद्दाख हाई कोर्ट दे मुख् न्यायधीश न्यायमूर्ति ताशी रबस्तन हुंदी सरपरस्ती च होई। कुल इक लख 99 ज्हार 853 मामलें इक सौ 65 बैच आस्सेआ जैते गे। इक लख 88 ज्हार 422 दा नबेड़ा कीता गेआ। कुल 39 करोड़ 4 लख 49 ज्हार 391 रपे दा मुआवजे बी दस्से गे। इंदे च एक्सीडेंट क्लेमस, सिविल, अपराधिकें ते श्रम मजदूरी सरबन्धी होर दुए मामले शामिल हे। दूई लोक अदालत दा सरिस्ता 10 मई 2025 गी कीता जाग। विशेष उपभोक्ता लोक अदालत दा आयोजन 26 इपैल 2025 गी कीता जाग।

<><><><><><>

CS-Migrants Meeting

मुख् सचिव अटल डुल्लू होरें कल आपदा प्रबंधन मैहकमे कन्नै इक बैठक लाइयै जम्मू कश्मीर दे विस्थापतें लेई राहत ते पुर्नवास सरबन्धी जतनें दी समीक्षा कीती। उनें राष्ट्रीय खाद्य सुरक्षा कनून तैहत विस्थापत परिवारें गी आहन्नने पंशन ते वजीफे दा लाह सब्बने जोड़ी पजाने दे कम्में गी मित्थे गेदे समें दे अंदर अंदर पूरा करने पर जोर दित्ता। एहदे इलावा मुख् सचिव होरें कश्मीरी विस्थापतें दिएं दिक्कतें शकैतें गी सुनने लेई बनाए गेदे पोर्टल गी अपडेट करने ते इंदे असरदार ढंगै सिर नबेड़े लेई नोडल अफसर नियुक्त करने लेई बी आखेआ। बैठक च पाकिस्तान दे नजैज कब्जे आले जम्मू कश्मीर थमां ते पच्छमी पाकिस्तान थमां आए रिफ्यूजीएं तगर पुज्ज बनाने आले अभियानें बारे प्रगति दी बी समीक्षा कीती। बैठक च केई निर्माण परियोजनाएं दी स्थिति दी बी समीक्षा कीती गई जिंदे च सुकेतर च पी ओ के भवन ते जगटी च समुदायक हाल दा निर्माण कम्म बी शामिल ऐ। एहदे इलावा अपना घर बाहरे छोड़ियै आए दे इनें लोकें दिएं होरने मंगें पर बी चर्चा कीती गई।

<><><><><><>

Doda Desks

डोडा दे डिप्टी कमीशनर हरविंदर सिंह होरें कल स्कूले च बेहियै पढ़ने आले कोई 5 जहार डैस्कें गी लेइयै जा'रदे गड़िडएं दे काफले गी झंडी दस्सियै रवाना कीता। एह सारे डैस्कें प्लास्टिक ते होर दुए कबाड़ दा इस्तेमाल करदे होई तैआर कीते गेदे न जिस कबाड़ गी खपाना नामुमकिन होंदा ऐ। इंडियन पॉल्यूशन कंट्रोल एसोसिएशन आईपीसीए ते एसबीआई कोर्ड तरफा दान कीते गेदे इनें डैस्क दे हिस्से कटुआ च बनाए गे ते मगरा डोडा च इनें गी फिट करियै तैआर कीता गेआ। इक डैस्क तैआर करने च 35 किलोग्राम प्लास्टिक कबाड़ दा इस्तेमाल कीता गेआ ऐ। एहदे नै दऊं फायदे होए न, इक ते स्कूलें च बच्चें गी बौहने लेई थोंगन ते कन्नै प्लास्टिक ते होर दुआ, नेइं सड़ने गल्लने आला कबाड़ जेहड़ा साढ़े वातावरण गी प्रदूषत करदा ऐ, ओहदे कोला बी बचेआ जाई सकोग। आकाशवाणी समाचार कन्नै गल्ल करदे होई डीसी डोडा हरविंदर सिंह होरें आखेआ.....बाईट

<><><><><><>

Khelo India Winter Games

खेलो इंडिया विंटर गेम्स-2025 दा दुआ चरण अज्जै थमां कश्मीर घाटी दी मशहूर सैलानी थाहर गुलमर्ग च शुरू होआ करदा ऐ। एहदे च स्कीइंग ते स्नोबोर्डिंग दिएं प्रतियोगिताएं दा आयोजन कीता जाहग। पैहले चरण च केंद्र शासित प्रदेश लद्दाख जेतू रेहा हा जेहड़ा इस चरण च अपने सब्बै खताब बरकरार रक्खने दी कोशश करोग। दुए चरण दा खेलो इंडिया विंटर गेम्स पैहले 22 थमां 25 फरवरी तक आयोजित होना हा, पर गुलमर्ग च बर्फ दी कमी दे कारण इसी अगड़ा पाना पेई गेआ हा। एहदे शा पैहले, इ'नें खेड्डें दा पैहला चरण इस ब'रे जनवरी च लद्दाख दे लेह जिले च आयोजित कीता गेआ हा।

<><><><><><>

Sakina Women

समाज कल्याण ते शिक्षा मंत्री सकीना इत्तू होरें आखेआ ऐ जे महिलाएं पिछले किश समें दरान हर इक क्षेत्र च शानदार कम्म कीता ऐ ते समाज गी आकार देने च ओ इक महत्वै आली भूमिका निभा करदियां न। मंत्री होरें लिंग समानता, महिला सशक्तिकरण ते समावेशी विकास दी जरूरत पर जोर दिंदे होई आखेआ ऐ जे एहदे नै गै इक बरोबरी आले सभ्य समाज दा निर्माण होई सकदा ऐ। अंतर्राष्ट्रीय महिला दिवस दे सिलसिले च जम्मू दे कनवेंशन सेंटर च लग्गे दे कार्यक्रम दरान मंत्री होरें महिलाएं गी आखेआ जे ओह रुकावटें बंधने गी त्रोटियै अपनी छमता कन्नै राष्ट्र दे निर्माण च योगदान देने लेई अगगे औन। सकीना इत्तू होरें महिला शोषण, दाज मंगने दी कबैत ते नशाखोरी पर रोक लाने लेई किट्ठे रलियै जतन करने पर बी जोर दित्ता।

<><><><><><>

Award Education

राजौरी दी जिला एजुकेशन रिसोर्स पर्सन मधु शर्मा होरें गी शिक्षा दे क्षेत्र च उंदे टकोह्दे योगदान लेई राष्ट्रीय सतह दे सम्मान कन्नै नवाजेआ गेआ ऐ। उनें गी सम्मान देइयै शिखा ते बरोबरी आली भेठा उंदे जतनें गी सराह्या गेआ ऐ। आकाशवाणी समाचार कन्नै गल्ल करदे होई मधु शर्मा होरें विकसित भारत दे लक्ष्य गी हासल करने च लिंग दे आधार पर बरीकी दी महत्वे आली भूमिका गी उजागर कीता।

<><><><><><>

Samba Women

सांबा जिले च महिला आत्म निर्भर, सशक्त ते प्रगतिशील होआ'रदियां न। ओह भारत सरकार आस्सेआ चलाए जा'रदे जतनें थमां लाह लै'रदियां न। अपनी समर्थ दा निर्माण करा'रदियां न ते आत्म निर्भर होआ'रदियां न। सांबा जिले दे परमंडल ब्लाक दी प्रीती देवी मकामी महिलाएं लेई सफलता दा प्रतीक बनियां न।

<><><><><><>

Cricket

आईसीसी चैंपिन्स ट्राफी क्रिकेट दे फाइनल मकाबले च अज्ज दुबई च भारत दा सामना न्यूजीलैंड कन्नै होग। एह मैच भारतीय समें मताबक दपैहरी ढाई बजे शुरू होग। गौरतलब ऐ जे इस प्रतियोगिता च भारतीय टीम अजें तोड़ी इक बी मैच नेई हारी ते ग्रुप स्टेज च भारती टीम नै न्यूजीलैंड गी 44 रंजें कन्नै हराई दित्ता हा। तोआई न्यूजीलैंड नै बी इक्कै मैच गी छोड़ियै अपने बाकी सारे मकाबलें च जित्त दर्ज कीती ही।

<><><><><><>